

DOOPVIERING

Lesing 1

Doopviering in die lig van die doop

1. Wat sê die Sinode aangaande doop en doopviering?

Die Algemene Sinode van 2004 besluit as volg:

- Die Algemene Sinode besluit om Sinodes en kerkrade weereens dringend aan te moedig om groot erns te maak met die verantwoordelike vertolking van die doop en nagmaal soos ons dit verstaan binne die Gereformeerde verstaan van die evangelie van die genade.
- Die Sinode moedig kerkrade aan om gesamentlike doopvierings in die erediens verder te ontwikkel en uit te bou.
- Die Sinode versoek gemeentes om nie met viering die suggestie van 'n herdoop te laat posvat nie.
- Die Sinode moedig kerkrade ook aan om die moontlikheid van individuele doopvierings in die erediens en in kleiner groepe in die gemeente te ontwikkel.

Die Algemene Sinode van 2007 besluit as volg:

- Die Algemene Sinode neem bogenoemde verslag in ontvangs as vertrekpunt vir omvattende gesprek aangaande doop en doopviering.
- Die Algemene Sinode bevestig dat die Christelike doop vanuit die radikaliteit van die genade as onherhaalbaar beskou moet word.
- Met groot begrip vir die kragtige betekenis van simbole en rituele en met behoud van die Christelike doop as eenmalige sakrament (vir kinders en volwassenes) dra die Algemene Sinode dit aan Sinodes op om te besin oor toepaslike rituele waardeur gedoopte lidmate van die werklikheid van God in hulle lewe kan getuig.
- Sodanige rituele sou ook net gevier kon word deur persone wat hulle Christelike doop erken.
- Die Algemene Sinode gee aan Algemene Diensgroep Gemeente-Ontwikkeling opdrag om die Sinode te bedien met 'n eenvoudige en helder beleid en voorstelle aangaande doop, doopviering, kindernagmaal en kategeese wat beide ons tradisie en die praktiese bedieningskonteks van ons dag in ag sal neem.

Die Gemeente verstaan daarom dat:

- Die praktyk van doopviering reeds deur die Algemene Sinode goedgekeur is.
- Dat gemeentes en Sinodes aangemoedig word om doopvierings verder te ontwikkel.
- Gemeentes waak dat doopvierings en gepaardgaande rituele nie met herdoop verwar kan word nie. Die Sinode besluit dat ons ten opsigte van die ontwikkeling van die doopviering die geleentheid benut om:
 - die vrye genade van God en die vaste grond waarop ons verlossing berus te beklemtoon.
 - die ryk betekenis van die Christelike doop opnuut te verduidelik.

2. Wat sê die Bybel aangaande doop en doopviering?

2.1 Die doop is 'n verbondshandeling.

Lees en bespreek Gen. 17:7, Gal. 3:29 en Rom. 4:11,16 en sê vir mekaar wat God doen en wat ouers doen wanneer 'n kindjie gedoop word.

Antwoord: Ons word gedoop omdat God 'n verbond van genade met ons en ons kinders wil sluit. Hy het eeue gelede vir Abraham, die vader van die gelowiges gesê: “Ek bring 'n verbond tot stand tussen My en jou en jou nageslag en al hulle geslagte. Dit is 'n blywende verbond: Ek sal jou God wees en ook die God van jou nageslag (Gen. 17:7). Die doop is dus in die eerste instansie 'n handeling waarin God Homself aan die dopeling verbind. God is die handelende Persoon by die doop.

In die tweede plek belowe ouers wat hul kinders laat doop om so 'n kind vir die Here groot te maak. Dit beteken dat die ouers van 'n gedoopte kind hom/haar moet lei en begelei om in 'n lewende verhouding met God te staan.

2.2 Wat was die Ou-Testamentiese tekens van die verbond?

Lees Gen. 17:7 en Eks. 12:3,7,13

Antwoord:

Die besnydenis.

Die Pasga

2.3 Wat is volgens die Gereformeerde tradisie die Nuwe-Testamentiese tekens van God se verbond met ons?

Lees Mt. 28:18-20, Lk. 22:14-20 en 1 Kor. 11:23-26.

Antwoord:

Die doop

Die nagmaal

2.4 Kom die Christelike doop / verbondsdooop van kinders in die Nuwe Testament voor? Lees Hd 18:8

3. Wat is die doopviering dan?

Antwoord:

Met die doopviering kan gedoopte lidmate antwoord op God se verbintenis met hulle. As kind het die Here verklaar dat Hy graag vir jou 'n God wil wees.

Met jou doopviering verklaar jy dat jy jou lewe aan Hom toewy en Hom in alles as jou God wil erken.

Soos met die belydenis van geloof is die doopviering ook 'n geloofsverklaring. Dit vervang egter nie die belydenis van geloof nie.

4. Wanneer kan 'n lidmaat aansoek doen vir doopviering?

Antwoord:

- a. Wanneer jy tot bekering gekom het. (Hd 2:38)
- b. Wanneer jy soos Jesus in Lk. 3:21-23 jousef aan God wil verbind m.b.t. jou roeping.
- c. Wanneer jy jou ou sondige lewe wil aflê en bevestig dat jy saam met Christus gesterf het en saam met Hom begrawe is, maar dat jy ook deur sy opstanding lewend geword het vir God, vgl. Rom. 6:11 en Gal. 3:27.
- d. Ander redes:
 - Wanneer jy in jou geloofslewe teruggeval het en jou opnuut aan God wil toewy.
 - Wanneer jy siek was of swaar gekry het en graag jousef opnuut aan God wil verbind.

In die tweede lesing word bogenoemde volledig hanteer.

5. Terminologie : Doop en doopviering

Uit hoofde van die Gereformeerde tradisie word die verbondsdoop en wat ons voortaan as doopviering sal beskryf in die Nuwe Testament met dieselfde terminologie verwoord, nl. die woord “βαπτισμ.” “βαπτισμ” word in Afrikaans met doop vertaal. Wanneer ons vanuit die Gereformeerde tradisie Mt 28:18-20 aanhaal om die verbondsdoop aan te dui, wil ons daarmee aantoon dat God 'n verbond met die gelowige ouer en sy/haar kind aangaan, maar terselfertyd het baie gelowiges die verlange op grond van bogenoemde teks om juis die doopviering te ondergaan. Gedoopte volwassenes wat nie met hul belydenisaflegging reeds bekeer was nie, het veral so 'n behoefte. Om verwarring uit te skakel maak ons dus onderskeid tussen doop en doopviering, alhoewel daar in die Bybel nie so 'n onderskeid bestaan nie.

6. Is die doopviering 'n tweede doop of herdoop?

Antwoord:

Nee, met die doopviering word die Christelike doop nie ontken nie. Die Christelike doop is 'n eenmalige, onherhaalbare toesegging van God se beloftes.

Die doopviering probeer ook nie om die Christelike doop te vervang nie. Die doopviering is 'n bevestiging dat God se beloftes aan ons in vervulling gegaan het en dat ons nou 'n lewe in Christus deur die Heilige Gees lei.

Lesing 2

Redes vir Doopviering

1. Inleiding

Ons is deeglik bewus van lidmate wat 'n behoefte het aan “doopviering” soos deur die Sinode aanbeveel en goedgekeur. Hierdie lidmate het nie in die algemeen 'n probleem met die kinder- of verbondsdooop as sodanig nie. Hulle behoefte is om 'n Bybelse handeling te ondergaan wat getuig van 'n lewende verhouding met die Here.

God se pad met elkeen van ons is uniek. Sommige van ons word groot, baie bewus van God se sorg en betrokkenheid. Diegene leef doodgewoon voort in dit wat die Here beloof het en daar is by hulle geen kwessie dat hulle God met woord en daad wil behaag nie, vergelyk 2 Tim. 1:5

Ander mense het later in hulle lewe 'n lewensveranderende ontmoeting met die lewende God. Dikwels is daar by hulle 'n brandende begeerte om daarvan te getuig. Die doopviering bied dan die geleentheid om in die openbaar te vertel wat God in hul lewe gedoen het. Dit is 'n geleentheid **om te getuig van God se verbondstrou en dat Sy Woord waar is.**

As deel van die wyer familie van gemeentes binne die NG Kerk in ons stad en land, wil ons graag aan lidmate die geleentheid gee om by wyse van die doopviering uitdrukking aan hulle geloof te gee. Ons wil graag die geestelike behoefte van lidmate aanspreek en daarom die “doopviering” as 'n instelling in die gemeente implementeer.

Die doop van kinders en babas is inderdaad die bevestiging van God se guns en onverdiende genade.

- Die doopviering is 'n feesviering, 'n “celebration”, 'n vreugdevolle en uitbundige bevestiging en getuienis dat die Here getrou is en dat ons daarvan wil getuig.
- Hierdie handeling bevestig jou vaste geloof in God en getuig van jou persoonlike geloofsverbintenis.

2. Wanneer kan 'n lidmaat aansoek doen vir doopviering?

2.1 Bespreek : Wat het jou gedring of oortuig om die doopviering te ondergaan?

a. Wanneer jy tot bekering gekom het

- Johannes die Doper sê: *Bekeer julle, want die koninkryk van die hemel het naby gekom* (Mt.3:2)
- Jesus sê: *Bekeer julle, want die koninkryk van God het naby gekom.* (Mt.4:17)
- Petrus skryf in 2 Pet.3:9 *Die Here stel nie die vervulling van sy belofte uit nie, al dink party mense so. Nee, Hy is geduldig met julle, omdat Hy nie wil hê dat iemand verlore gaan nie: Hy wil hê dat almal hulle moet bekeer*

- Hd.2:38 – *Toe antwoord Petrus hulle: Bekeer julle en laat elkeen van julle gedoop word in die Naam van Jesus Christus, en God sal julle sondes vergewe en julle sal die Heilige Gees as gawe ontvang.*
- Uit bogenoemde teksgedeeltes ontstaan die behoefte by baie lidmate om na hul bekering 'n doopvieringshandeling te ondergaan. Die doopviering word dan bedien aan lidmate wat hulle Christelike doop verstaan en begryp dat God 'n verbond met hulle en hulle ouers gesluit het.
- Sulke lidmate het gewoonlik ten tye van hul belydenis van hulle geloof nog nie tot bekering gekom nie en het 'n behoefte daaraan om in die openbaar te getuig en te bely dat hul aan God behoort.

Wat is bekering?

Bekering is 'n terugdraai na God, waardeur jy:

- Besef dat jy verlore is sonder Christus
- Jou sonde erken, bely en daarvan wegdraai
- Jesus as jou persoonlike Verlosser en Saligmaker in geloof aanneem
- Die Heilige Gees erken as God binne in jou.
- In en deur 'n lewende verhouding met die Drie-enige God lewe

b. Wanneer jy jou ou sondige lewe wil aflê en bevestig dat jy saam met Christus gesterf het en saam met Hom begrawe is, maar dat jy ook deur sy opstanding lewend geword het vir God.

Paulus beskryf dit as volg in Rom. 6:1-11 – *Betekene dit nou dat ons in die sonde moet voortlewe sodat die genade steeds oorvloediger kan word? Hoegenaamd nie! Ons is immers dood vir die sonde. Dis tog onmoontlik dat ons nog langer daarin kan voortlewe! Of het julle vergeet dat ons met ons doop een geword het met Christus Jesus en so saam met Hom gesterf het? Deur die doop is ons saam met Hom begrawe as mense wat deel in sy dood. En nou kan ons, net soos Christus wat deur 'n heerlike magsdaad van die Vader opgewek is, ook 'n totaal nuwe lewe leef. Aangesien ons met Hom een geword het in sy dood, sal ons ook saam met Hom opgewerk word tot 'n nuwe lewe. Ons weet dat ons ou, sondige self saam met Christus gekruisig is sodat die sonde se mag oor ons verbreek kan word en ons nie meer slawe van die sonde sal wees nie. Want as iemand sterf, word hy vry van die mag van die sonde. Aangesien ons saam met Christus gesterf het, weet ons dat ons ook deel sal hê aan sy lewe. Ons weet dit omdat Christus uit die dood opgewek is en nooit weer sal sterf nie. Die dood het geen mag meer oor Hom nie. Hy het eens en vir altyd vir die sonde gesterf en nou leef Hy vir God. Julle moet dus ook verseker weet dat julle vir die sonde dood is, en nou vir God lewe deurdat julle en is met Christus. In Christus reken God Jesus se soenverdienste aan die kruis vir elke gelowig toe asof hyself gesterf het. Meer nog, deur Jesus se opstanding uit die dood ontvang elke gelowige die opstanding uit die dood asof hy/sy self uit die dood opgestaan het. In wese beteken dit dat 'n mens in Christus 'n totaal nuwe mens geword het (2 Kor. 5:17-18). Jy sterf dus jou ou sondige natuur af en staan in 'n nuwe lewe saam met Christus op.*

c. Wanneer jy soos Jesus in Lk. 3:21-23 jouself aan God wil verbind m.b.t. jou roeping.

God praat en roep vandag nog mense, net soos Jesus sy dissipels geroep het, (Mt. 4:19). Mense wil soms uiterlik en prakties gestalte gee aan hul roeping en dit bevestig in die openbaar. Voordat Jesus met sy bediening begin het en deur die Heilige Gees in die woestyn weggelei is, is Hy deur Johannes gedoop, wat 'n toewydingsdoop was. By hierdie geleentheid het God die Vader sowel as die Heilige Gees hulle in die openbaar aan Jesus se bediening verbind. Doopviering kan dus hierdie behoefte vervul.

Lk. 3:21-23 – *Toe al die mense hulle laat doop het, is Jesus ook gedoop, en terwyl Hy staan en bid, het die hemel oopgegaan en het die Heilige Gees in sigbare gestalte soos 'n duif op Hom neergedaal. Daar was ook 'n stem uit die hemel: "Jy is my geliefde Seun. Oor Jou verheug Ek My.*

d. Wanneer jy in jou geloofslewe teruggeval het en jou opnuut aan God wil toewy.

In die lewe van 'n gelowige bly die vyand 'n realiteit. Die gelowige word aan versoekings blootgestel.

- Satan, vgl Jh 10:9-10, 1 Pet 5:8 – *Wees nugter, wees wakker! Julle vyand die duiwel, loop rond soos 'n brullende leeu, op soek na iemand om te verslind.*
- Die gevalle wêreld, vgl. 1 Jh. 2:15-17 - *Hou op om die wêreld en die dinge van die wêreld lief te hê. As iemand die wêreld liefhet, is hy beslis ook nie lief vir die Vader nie. Wat ook al in die wêreld bestaan, alles wat tipies is van die menslike begeerte, die begeerte vir alles wat die oog sien, en die valse roem op besittings, kom nie van die Vader nie , maar het sy oorsprong in die wêreld. Die wêreld en sy begeertes is aan die verbygaan. Wie die wil van God uitvoer, leef egter vir altyd.*
- Ons sondige natuur, vgl. Gal. 5:16-17 – *Ek sê: Laat julle leefstyl eerder deur die Gees bepaal word. Dan sal julle glad nie aan die begeertes van julle sondige geaardheid toegee nie. 'n Mens se sondige geaardheid wil dinge doen wat teen die Gees is, en die Gees wil dinge doen wat teen jou sondige geaardheid is, want hulle is mekaar se vyande. Julle kan dus nie sommer maar net alles doen wat julle wil nie.*

e. Ander moontlike handeling om Christus se heilswerk te vier:

• **Paasfees**

Handeling: *Handewassing* as simbool van reiniging.

Voetewassing as simbool van diensbaarheid deur die voetewasser.

Nagmaal

• **Pinksterfees**

Handeling: *Salwing* met olie as simbool van die vervulling deur die Heilige Gees.

Steek kerse aan as teken van vervulling met die Heilige Gees en getuienis in die wêreld.

• **Kersfees**

Handeling: *Steek kers aan of sit lig aan* as teken en simbool dat die lig na die wêreld gekom het.

3. Kan mens meer as een keer die doopviering ondergaan?

Ja, afhangend van die behoefte en die korrekte verstaan daarvan sou 'n mens byvoorbeeld 'n doopviering kon ondergaan na jou bekering, om jou kinderdoop te vier en te bevestig dat jy God Drie-enig wil dien. Later sou jy ook by byvoorbeeld tydens Paasfees 'n spesiale vieringshandeling kan ondergaan soos handewassing as simbool van reiniging.

Nee, 'n mens moenie die doopviering gebruik as 'n bygelowige handeling, waardeur jy dit as 'n bo-natuurlike reddingsmiddel beskou, om jou te ontsondig nie. Dit sal 'n mistasting wees wat op ongeloof en onkunde berus.

4. Vorme van doopviering:

- Besprinkeling
- Begieting
- Onderdompeling
- Olie

5. Die proses van doopviering verloop as volg:

- 'n Lidmaat meld by 'n kantoor aan en spreek die behoefte uit om die doopviering te ondergaan.
- Tydens toerusting en voorbereiding verneem die groepleier wat aanleiding gegee het tot die versoek. 'n Afspraak word gemaak indien nodig.
- Tydens so 'n geleentheid word die persoon se verstaan van die doopviering vasgestel en daar word seker gemaak dat die geleentheid nie as 'n herdoop verstaan word nie, maar as 'n vierings- en getuienisgeleentheid.
- Tydens die doopvieringsereemonie: Die lidmaat bely sy/haar geloof hardop in 2-3 sinne bv. *Ek het die Here baie lief en wil Hom met my hele lewe gehoorsaam. / Deur hierdie handeling vier ek God se getrouheid in my lewe. Hy het nie opgegee toe ek ver van Hom af was nie. / Ek getuig vandag dat God betroubaar is, ek vier Sy genade.*
- Die leraar sê voor die doopviering die volgende woorde : *In die Naam van die Vader, die Seun en die Heilige Gees.*
- Die leraar sê na die doopviering : *Hiermee bevestig jy dat jy saam met Christus gesterf het, en saam met Hom in 'n nuwe lewe opgestaan het.*
- Opsioneel: Die leraar kan die lidmaat gelukwens en 'n gebed doen.

Let asseblief op die volgende:

- Jy moet uiteraard gepas geklee wees vir die geleentheid. Maak seker dat klere nie deursigtig is nie. Bring 'n handdoek en droë klere saam.

Die volgende geleentheid vind plaas op _____

By _____ om _____

Meld asseblief 30 minute voor die tyd aan sodat finale reëlins getref kan word.

Lesing 3

Die betekenis van die doopviering

Regte redes vir die Doopviering

Sake waaroor ons saamstem:

- Jy ondergaan nie die doopviering as gevolg van **bygeloof nie**, bv. as jy jou doop vier, sal jy ophou om bepaalde sondes te doen.
- Jy ondergaan nie die doopviering **onder druk van ander mense nie**. Die doopviering is 'n persoonlike saak wat jy met die Here uitgemaak het. Sosiale (geestelike) druk van ander is nie hier ter sprake nie. Jy doen dit ook nie ter wille van sosiale eenvormigheid nie.
- Jy ondergaan nie die doopviering in die hoop dat so 'n **stap van gehoorsaamheid punte by God sal verdien** nie. Die doopviering voeg niks by die genadewerk van Christus by nie.
- Jy ondergaan nie die doopviering as bewys dat jy op 'n **hoër geestelike vlak** as ander gelowiges funksioneer nie.

Tydens hierdie geleentheid:

- Vier jy die genadewerk van Christus.
 - Getuig jy van 'n lewende verhouding met Christus en dat jy sy dissipel is.
 - Vier jy jou inlywing in die liggaam van Christus. (Kol 2:11-12)
- 1. Om die doopviering ten volle te benut behoort jy aan die geestelike pad te dink wat jy tot nou toe met God geloop het. Bespreek nou in groepsverband die volgende vrae met mekaar:**

1.1 Gesels oor jou lewe voor jy Jesus Christus as Saligmaker leer ken het.

1.2 Hoe het die Here jou gered? Vertel van jou bekering: hoe, waar, wanneer, tydperk?

1.3 Vertel va jou lewe nadat jy die Here leer ken het: Wat het verander? Vertel van jou nuwe gesindheid, dade en belangstellings.

2. Stel nou jou lewe bewustelik onder beheer van die Heilige Gees:

2.1 Verklaar dat jy begeer om deel te hê aan God se Koninkryk vgl Mt. 5:3 – *Geseënd is die wat weet hoe afhanklik hulle van God is, want aan hulle behoort die koninkryk van die hemel.*

2.2 Bely enige sondes waarvan jy nou bewus is.

2.3 Aanvaar God se vergifnis op grond van 1 Jh. 1:8-9 - *As ons beweer dat ons nie sonde het nie, bedrieg ons onself en is die waarheid nie in ons nie. Maar as ons ons sondes bely – Hy is getrou en regverdig, Hy vergewe ons ons sondes en reinig ons van alle ongeregtigheid.*

2.4 Nooi die Heilige Gees om die beheer van jou lewe oor te neem.

(Hierdie materiaal is 'n verwerking van NG Moreletapark en ons wil hiermee erkenning en dank gee aan Moreletapark gemeente)